

Dialuna 16 di november na Cas di Cultura

Documentario riba 400 aña di comunidad Hudiu na Aruba, Corsou y Surinam

ORANJESTAD – E linguista y activista cultural, drs. Mirto Lacle ta organisando otro actividad pa enrikece e desaroyo cultural riba nos isla.

E actividad aki lo tuma luga dialuna 16 di november pa 6'or atardi na Cas di Cultura. Riba e dia ey lo tin presentacion di tres documentario, un di nan ta "A Kippah in the Caribbean" cu ta trata riba 400 aña di presencia di e comunidad Hudiu na Corsou, Aruba y Surinam. E documentario aki ta un iniciativa di Tanja Fraai and Mike Ho-Sam-Sooi.

Documentarionan

Drs. Lacle a bisa cu e dos productor di e documen-



tario aki ta haci un recorrido di 400 aña riba e presencia di e comunidad Hudiu di e tres pais menciona ariba. Ta trata di nan historia, tradicion, custumber y religion. Tin preguntanan cu abo mes lo haya contesta dor di e docu-

mentario aki, manera: Unda tin comunidad Hudiu den e region ainda? Kico ta nan influencia mutuo? Tambe ta aparece e documentario aki e generacion nobo di Hudiu ta duna contesta riba preguntanan relaciona cu e futuro di

nan comunidad den e region Caribe.

Tambe lo tin dos documentario mas produci pa sr. Rhy-an Oduber y drs. Mirto Lacle, conhuntamente cu e team di Biblioteca Nacional Aruba. E prome ta relaciona cu un homenahe na cuater dama Arubiana considera como icono musical, nan ta Digna

Lacle-Herrera: Maybeline Arends- Croes, Tica Gil y Carmen Herrera. Nan lo versa nan opinion riba musica y nan ta trata riba e buki di mucha "Nos ta Canta" cu a nace na aña 1962, y kico e buki aki a nifica den nan carera como personanan cu a carga e antorcha pa musica di Aruba te e dia di awe.

E di tres documentario ta

dedica na un persona cu a nace na aña 1914 y cu ainda ta na biba cu 101 aña. Na aña 1946 el a pone pia na Aruba, el a bin cu su herencia cultural compila den su bida como nabegante. Trata di Willy Eugene Humbert van Eer. Sr. Lacle ta considera como un honor cu Aruba ta bay dedica e documentario na sr. van Eer kende pa casi 70 aña ta estableci riba nos isla.

"Ta trata di tres documentario. Cada un di nan cu nan merito", el a bisa. Tur hende ta bon bini y carchi ta obtenibel na Biblioteca of cerca sr. Mirto Lacle, cel: 740-2044, ya cu entrada ta totalmente gratis. El a gradici tur hende y instancia cu a aporta pa haci e actividad aki posibel. □